

## **Канон акафист Пресвятой Богородице**

### *Тропарь, глас 8.*

Повеленное таинство прием в разуме, в крове Иосифове гаданием предста  
безплотный, глаголя неискусней браку: преклонеи схождением Небеса,  
вмещается неизменно весь в Тя. Его же и видя в ложеснах Твоих приемша  
рабии зрак, ужасаюся звати Ти: радуися Невесто неневестная.

### *Песнь 1. Ирмос.*

**От**верзу уста моя, и наполнятся Духа, и слово отрыгну Царице Матери и  
явлюся светло торжествуя, и воспою радуяся Тоя чюдеса.

**Запев:** Пресвятая Госпоже Богородице, услыши молитву раб Своих,  
молящихся Тебе (*поклон*).

**Запев:** Христову книгу одушевлену, запечатленну Тя Духом, великии архангел  
Чистая зря возглашаше Ти: радуися радости приятелице, Ея же ради  
праматерняя клятва разорится.

**Запев.** Адамово исправление, радуися Дево Богоневесто, адово умерщвление,  
радуися Всенепорочная, полато всех Царя. Радуися Престоле огнении  
Вседержителя.

**Слава.** Цвете неувядаемы, радуися едина прозябшая яблоко благовонное,  
радуися рождшая благоухание единого Царя. Радуися Неискусобрачная,  
мірови спасение.

**И ныне.** Чистоты сокровище, радуися, Ею же от падения нашего востяхом.  
Радуися сладкоуханныи крине Владычице, верных благоухая, Кадило  
благовонное, и миро многоценное.

**Катавасия:** Спаси от бед рабы Своя Богородице Дево, яко вси по  
Бозе к Тебе прибегаем, яко к нерушимей стене и заступлению (*поклон*).

**Господи помилуй** (*трижды с поклонами*).

### *Песнь 3. Ирмос.*

**Т**воя певцы Богородице, живыи не тления источниче, лик Себе совокупльши  
духовен, утверди в божественей Ти славе, и венцем славы сподоби.

**Запев.** Клас прозябшая божественны, яко нива неоранная яве, радуися  
одушевленная трапезо, Хлеб животный вмещшая. Радуися животныя воды  
источниче неистоощаемы Владычице.

**Запев.** Юница Юнец рождши непорочныи, радуися верным. Радуися Агнице,

рождьшая Божияго Агньца, вземлющаго міру всему прегрешения. Радуися теплое очистилище.

**Слава.** Утро светлейшее, радуися Едина, Солнца носящи Христа, свету жилище. Радуися тму разрушивше, и мрачныя бесы отнюд отгнавши.

**И ныне.** Радуися двере едина, Ею же Слово проиде едино, Яже верей и врата аду Владычице рожеством Своим стерши. Радуися божественни входе спасаемым Богоневесто.

*Катавасия.*

### Песнь 4. Ирмос.

Седяи в славе на Престоле Божествене, на облаце легце, прииде Исус Пребожественни, от Пречистыя Девы, и спасе вопиющыя, слава Христе силе Твоей.

**Запев.** Во гласех пении, верою Тебе вопием Всепетая: радуися тучная горо, и усыренная Духом. Радуися свещниче, и ручко манну носящи, услаждающи всех благочестивых чювствия.

**Запев.** Очистилище міру, радуися Пречистая Владычице. Радуися лестнице, от земли всех возвысивши благодатию. Радуися мосте, воистину преводяи всех от смерти к животу, поющих Тя.

**Запев.** Небес превышшая, радуися земное основание, во Своих ложеснах Пречистая нетрудно поносивши. Радуися червленице, багряницу божественую омочивши от кровей Твоих, Цареве силам.

**Слава.** Законодавца рождьшая истиннаго, радуися Владычице, иже беззакония всех туне очищающаго. Недоведомая глубино, высоты неизреченная, браконейскусная, Ею же мы обожихомся.

**И ныне.** Тя исплетшую мірови нерукоплетен венец, песнословяще, радуися Тебе Дево зovem, хранилище всех и ограждение, и утверждение, и священное прибежище.

*Катавасия.*

### Песнь 5. Ирмос.

Удивишася всяческая, о Божественней славе Твоей, Ты бо браконейскусная Девице, прият во утробе надо всеми сущаго Бога, и родила еси безлетнаго Сына, всем воспевающим Тя мир подавающа.

**Запев.** Путь порождьшая жизни, радуися Пренепорочная, яже от потопа греховнаго мір спасшая, радуися Богоневесто, слышание и глаголение

страшно, радуися пребывание Владыки всея твари.

**Запев.** Крепость и утверждение человеком, радуися Владычице, место освящения славы, умерщвление адово, чертоже всесветлыи, радуися ангелом радость, радуися Помощнице верно молящимтися.

**Запев.** Огнеобразная колеснице Словоу, радуися Владычице, одушевленни Раю, животное Древо, посреде имея жизни Господа, Его же сладость оживляет верою причащающихся, и тли подклонившихся.

**Слава.** Укрепляеми силою Твоею, верно вопием Ти: радуися граде всех Царя, преславная и достослышанная, о Ней же глаголана быша яве: горо несекомая, радуися глубино неизмерная.

**И ныне.** Пространное селение Словоу, радуися Пречистая, сосуде, иже Божественни бисер произведши, радуися вседивная, всех к Богу примирение, блажащих Тя Богородице всегда.

*Катавасия.*

### Песнь 6. Ирмос.

Божественное се и всечестное совершающе празднество, богомудреннии Божия Матере, приидите руками восплещем, от Нея рождышагося верою славяще.

**Запев.** Чертоже Словоу нескверный, вина всех обожения, радуися Всечистая пророком оглашение, радуися апостолом удобрение.

**Запев.** От Тебе роса укану, пламень многобожия угасивши, тем вопием Ти: радуися руно одушевленное, еже Гедеон Дево прежде виде.

**Слава.** Се Тебе Дево радуися зовем, пристанище нам буди труждающимся, и отишие в пучине скорбей, и соблазнов всех сопротивника.

**И ныне.** Радости вина, облагодати наш помысл, еже звати Тебе, радуися неопалимая купино, и облаче всесветлыи, яже верных непрестанно осеняющи.

*Катавасия.*

*Слава, и ныне.*

*Посем кондаки и икосы Пресвятей Богородице, Глас 8-й.*

### Кондак 1

**В**збранной Воеводе победительная, яко избавльшеся от злых, благодарственная восписуем Ти раби Твои Богородице. Но яко имущи державу непобедимую, от всяких нас бед свободи, да зовем Ти: радуися, Невесто Невестая.

### Икос

**А**нгел предстатель, с Небесе послан бысть рещи Богородице: радуися, и с безплотным гласом воплощаема Тя зря Господи, ужасашеся и стояше, зовыи к Ней таковая: радуися Ея же ради радость восияет, радуися Ея же ради клятва исчезнет. Радуися падшаго Адама востание, радуися слез Еввин избавление. Радуися высоту неудобь восходима человеческими помыслы, радуися глубино неудобь зримая и ангельским очима. Радуися яко еси Царево седалище, радуися яко носиши Носящаго вся. Радуися звездо являющая Солнце, радуися утробо божественаго воплощения, радуися Ея же ради обновляется тварь, радуися Ея же ради поклоняемся Творцу (*поклон*), радуися Невесто невестная.

### Кондак 2

**В**идящи Святая Себе в чистоте, рече Гавриилу дерзостне: преславное твоего гласа, неудобь приятно Ми души является: безсеменна бо зачатия рожество предглаголеши, зовыи, аллилуиа.

### Икос

**Р**азум неразумен, разумети Девая ищущи, возопи к служащему: из боку чисту, Сыну како есть родитися мощно, рцы Ми; к Ней же он рече со страхом, обаче зовыи сице: радуися совета неизреченнаго тайно, радуися молчанием молящихся верою. Радуися чудес Христовых начало, радуися велением Его главо. Радуися лестнице Небесная по ней же сниде Бог, радуися мосте преводяи от земли на Небо. Радуися ангелом многословящее чудо, радуися бесовом многоплачевныи струпе. Радуися иже Свет неизреченно рождьши, радуися еже како, ни единого же научивши. Радуися премудрых превосходящи разумы, радуися верных озаряющи смыслы: радуися Невесто невестная.

### Кондак 3

**С**ила Вышняго осени тогда к зачатию Браконеискусную, и благоплодная Тоя ложесна, яко село показа сладко, всем хотящим жати спасение, внегда пети сице, аллилуиа.

### Икос

**И**мущи богоприятну Девая утробу, востече к Елисавефи: младенец же оная абие познав Сея целование, радовашеся. И играньми яко песньми, вопияше к Богородице: радуися отрасли неувядаемыя

лозо, радуися плода безсмертнаго стяжание. Радуися делателя делаючи  
Человеколюбца, радуися садителя жизни нашея породьши. Радуися браздо  
растящая гобзование щедрот, радуися трапезо носящая обилие очищению.  
Радуися яко Рай пищныи процветаеши, радуися яко пристанище душам  
готовиши. Радуися приятное молитвы кадило, радуися всего мiра очищение,  
радуися Божие к смертным благоволение, радуися смертных к Богу  
дерзновение, радуися Невесто невестная.

### Кондак 4

**Б**урю внутрь имея помышлении неверных, целомудренныи Иосиф, смутися,  
прежде небрачну Тя зря, и бракоокрадовану помышляше Непорочная: уведев  
же Твое зачатие от Духа Свята, рече, аллилуиа.

### Икос

**С**лышаша пастырие, ангелом поющим плотское Христово пришествие, и  
текше яко к Пастырю, видевша Того яко Агньца непорочна во чреве Мариине  
пасшася, Юже поюще и реша: радуися Агньца и Пастыря Мати, радуися дворе  
словесных овец. Радуися невидимых зверей мучение, радуися райским дверем  
отвержение. Радуися яко небесная срадуются с земными, радуися яко земная  
сликовствуют небесным. Радуися апостолом немолчная уста, радуися  
страстотерпцем непобедимая дерзосте. Радуися твердое вере основание,  
радуися светлое благодати познание. Радуися Ея же ради обнажися ад,  
радуися Ея же ради облекохомся славою, радуися Невесто невестная.

### Кондак 5

**Б**оготечную звезду видевше волсви, и тоя последоваша зари, и яко светилника  
держаше ю, тою искаху крепкаго Царя, и достигше Недостижимаго,  
порадовашася Ему, вопиюще, аллилуиа.

### Икос

**В**идеша отроцы халдейстии на руку Девичю, создавшаго рукама человека, и  
Владыку разумевающе Его, аще и рабии взят зрак, потщашася дарми угодити  
Ему, и возопити Благословенней: радуися звезды незаходимыя Мати, радуися  
заре тайнаго дне. Радуися прелести печь угасивши, радуися троицу ученик  
хранящи. Радуися мучителя немилостива изметаючи от начальства, радуися  
Господа Человеколюбца показавши Христа. Радуися еже варварскаго  
избавляючи служения, радуися скверных избавляющая дел. Радуися огня  
поклоняние угасивши, радуися пламене страстнаго изменяючи. Радуися  
персом наставнице целомудрия, радуися всех родов веселие, радуися Невесто  
невестная.

### Кондак 6

**П**роповедницы богоноснии бывше волсви, возвратишася в Вавилон, скончавше

Ти пророчество, и проповедавши Тя Христа всем, оставиша Ирода яко лжива, не ведуща пети, аллилуиа.

### Икос

**В**озсия во Египте просвещение истине, отгнал еси лжи тму. Идоли бо его, Спасе не терпяще Твоя крепости, падоша. Сих же избавльшиися вопияху к Богородице: радуися исправление человеком, радуися низпадение бесом. Радуися яже прелести державу поправши, радуися идолскую лесть обличивши. Радуися яко море потопивши фараона мысленнаго, радуися каменю напоивши жаждущыя живота. Радуися огнени столпе наставляя сущих во тме, радуися покрове миру ширши облака. Радуися пище манны приемнице, радуися пищи святыя служителю. Радуися земле обетованная, радуися из Нея же течет мед и млеко, радуися Невесто невестная.

### Кондак 7

**Х**отящу Симеону от нынешняго века преставитися от прелестнаго, вдался еси яко младенец тому: но познался еси ему и Бог совершен. Тем убо удивися Твоей неизреченней премудрости, зовыи, аллилуиа.

### Икос

**Н**ову показа тварь, явлься Зиждитель нам, иже от Него бывшим, из безсеменныя прозяб утробы, и сохранив Ю яко же бе нетленна, да чудо видяще воспоем Ей вопиюще: радуися цвете нетления, радуися венче воздержания, радуися воскресения образ облистующи, радуися ангельское житие являющи. Радуися древо благоплодовитое, от него же питаются вернии, радуися древо благосеннолиственно, им же покрываются мнози. Радуися рождшая Наставника заблуждшим, радуися породившая Избавителя плененым. Радуися Судии праведнаго умоление, радуися многих согрешении прощение. Радуися одежде нагих дерзновения, радуися любы всяко желание побеждающи, радуися Невесто невестная.

### Кондак 8

**С**транно рожество видевше, устранимся мира, ум на Небо преложше. Сего бо ради высокии на земли явися смирен человек, хотя привлеци к высоте, вопиющих Ему, аллилуиа.

### Икос

**В**есь бе в нижних, и вышних никако же отступль, неописанное Слово: схождение бо божественно, неместно бысть прехождение, и рожество от Девы богоприятны слышаще сия: радуися Бога неместимаго вместилище, радуися честнаго таинства двере. Радуися неверных верное слышание, радуися верных известная похвало. Радуися колеснице Пресвятая Сущаго на Херувимех, радуися селение преславно Сущаго на Серафимех. Радуися противныя в то же

собравши, радуися яже девство и рожество сочетавши. Радуися яко Тебе ради разрешися преступление, радуися яко Тебе ради отверзесе Рай. Радуися ключу Царства Христова, радуися надеже благ вечных, радуися Невесто невестная.

### Кондак 9

**В**сяко естество ангельское удивися, великому Твоего вочеловечения делу: неприступнаго бо яко Бога, зряху всем приступна Человека, нам убо спребывающа, и слышаща от всех, аллилуиа.

### Икос

**В**итии многовещанны, яко рыбы безгласны видим о Тебе Богородице: недоумеют бо глаголати, како Девою пребываеши, и родити возможе; мы же таинству дивящися, верно вопием: радуися премудрости Божия приятелище, радуися промышления Его сокровище. Радуися любомудрецы немудры являющи, радуися хитрословесники безсловесны обличивши. Радуися яко обуяша лютыя взыскатели, радуися яко увядоша баснотворцы. Радуися афинеийския пленицы растерзающи, радуися рыбарем мрежи исполняющи. Радуися из глубины неведения извлачащи, радуися многих в разуме просвещающи. Радуися кораблю хотящим спастися, радуися пристанище житейских плаваний, радуися Невесто невестная.

### Кондак 10

**С**пасти хотя мир, иже всем украситель, к сему самообетован прииде, Пастырь сыи и Бог, нас ради явися по нас подобен: подобным бо подобное призвав яко Бог, слышит от всех, аллилуиа.

### Икос

**С**тена еси девам Богородице Дево, и всем иже к Тебе прибегающим. Ибо Небу и земли Творец устроив Тя Пречистая, вселься во утробу Твою, и научив приглашати Тебе всех: радуися тело девства, радуися двери спасения, радуися началнице мысленаго наздания, радуися подателнице Божественныя благодати, радуися Ты бо обновила еси зачатых студно, радуися, Ты бо наказала еси окраденныя умы. Радуися тлителя смыслом упражняющи, радуися сеятеля чистоте породьши. Радуися чертоже безсеменнаго уневещения, радуися верных Господеви сочетавши. Радуися добрая младопитателнице девам, радуися душам чертожнице святых. Радуися Невесто невестная.

### Кондак 11

**П**ение всяко побеждается, прострети тщащися к множеству многих щедрот Твоих: равночислены бо песца псалмы и песни, аще приносим Ти Царю Святыи, ничто же творим достойно, их же дал еси Тебе вопиющим, аллилуиа.

### Икос

**С**ветоприемную свещу, во тме сущым явльшуюся, зрим Святую Деву: невественныи бо вжигающи огонь, наставляет к разуму Божественному всех, зарею ум просвещающи, званием же почитаемую сим: радуися луче разумнаго солнца, радуися светило незаходимаго света. Радуися молние, души освещающи, радуися яко гром враги устрашающи. Радуися яко многосветлое возсияваеши просвещение, радуися яко многотекущую источаеши реку. Радуися купели живописующии образ, радуися греховную отъемлющи скверну. Радуися бане омывающая совесть, радуися чаше черплющая радость. Радуися обоняние Христова благоухания, радуися животе таинаго веселия, радуися Невесто невестная.

### Кондак 12

**Б**лагодать дати восхотев долгом древним, всех долгов решитель человеком Господь, прииде бо Собою ко отшедшим Того благодати, и раздрав рукописание, слышит от всех сице, аллилуиа.

### Икос

**П**оюще Твое рожество, хвалим Тя вси, яко одушевлен храм Богородице: в Твою бо вселися утробу, содержаи вся рукою Господь, освяти и прослави, и научи вопити Тебе всех: радуися селение Бога Слова, радуися святая святых больши. Радуися ковчеже позлащенныи Духом, радуися сокровище животу неистошимое. Радуися честныи венче царем благочестивым, радуися честная похвала иереом благоговейным. Радуися Церкви непоколебимыи столпе, радуися царству нерушимая стено. Радуися Ея же ради воздвигутся победы, радуися Ея же ради низпадают врази. Радуися тела моего врачевание, радуися души моя предстателнице, радуися Невесто невестная.

### Кондак 13

**О**, всепетая Мати, рождышая всех святых Святейшее Слово, нынешнее приношение приемши, от всякия напасти избави всех, и грядущия изми муки, вопиющыя Ти, аллилуиа.

*Глаголи сей кондак трижды с земными поклонами. Также 1-й икос: Ангел предстатель... Также кондак 1-й: Взбранной Воеводе...*

*Посем молитва Пресвятей Богородице.*

**П**риими всеблаготворная, Пресвятая Госпоже Владычице Богородительнице, сия честныя дары, Тебе единой прикладныя, от нас недостойных раб Твоих, яже от всех родов избранная, и всех тварей небесных и земных вышши явльшиися: понеже бо Тебе ради бысть

Господь сил с нами, и Тобою Сына Божия познахом, и сподобихомся Святаго Тела Его и Пречистыя Крове Его. Тем же блаженна еси Ты в родех родов Богоблаженная, яже Херувим светлейши, и Серафим честнейши сущая. И ныне всепетая Пресвятая Богородице, не престай молящися о нас недостойных рабех Твоих, еже избавитися нам от всякаго навета лукаваго, и от всякаго обстояния, и сохранитися нам неврежденным от всякаго всеядовитаго прилога диявольскаго, но даже до конца молитвами Твоими неосужденных нас соблюди: яко да Твоим заступлением, и помощью спасаемы, славу и хвалу, благодарение и поклоняние за вся иже в Троице Единому Богу, и всех Создателю возсылаем, ныне и присно и во веки веком, аминь (*поклон земной*).

### Песнь 7. Ирмос.

**Не** послужиша твари богомудрени паче Зиждителя, но огненное прещение мужески поправше, радовахуся поюще: препетии иже отцем Господь и Бог благословен еси.

**Запев.** Поем Тя вопиюще, радуися колеснице солнца разумнаго, лозо истинная, грозд зрелый возделавши, вино источающ, еже души веселящее, верю Тя славящих.

**Запев.** Врача всех породьшая, радуися Богоневесто, жезле тайны, цвет неувядаемый процветши. Радуися Владычице, яко Тебе ради радости наполняемся, и жизнь наследуем.

**Запев.** Ветующии не может язык Владычице песнословити Тя: ибо паче Серафим возвысися, рождьши Царя Христа, Его же моли, сей град Твой спасти от многих искушений.

**Слава.** Хвалят блажаще Тя концы, и любовьию зовут Ти, радуися свитче, в нем же перстом Отчимь написася Слово Чистая. Его же моли, в книги животныя, рабом Ти написатися Богородице.

**И ныне.** Молим раби Твои, и преклоняем колена сердца нашего: приклони ухо Твое Чистая, и спаси рабы Твоя погружаемая присно, и соблюди от всякаго вражия пленения Твои град Богородице.

*Катавасия.*

### Песнь 8. Ирмос.

**Отроки** благочестивыя в печи, рожество Богородичо спасло есть. Тогда убо образуемо, ныне же действуемо, вселенную всю воздвиже пети: Господа воспевайте дела, и превозносите Его во веки.

**Запев.** Ложесны Слово прияла еси, иже вся носящаго понесла еси, и млеко питала еси, манием питающаго вселенную всю Чистая: Ему же поем, Господа

воспевайте дела, и превозносите Его во веки.

**Запев.** Моисей разуме в купине, великое таинство рожества Твоего. Отроцы же прообразиша се явствено, посреде огня стояще и неопаляеми, нетленная Чистая Дево. Тем же Тя поем, и превозносим во веки.

**Запев.** Иже прежде лестию обнажени бывше, в ризу нетления облекохомся рождеством Твоим. И сидящи во тме прегрешении, свет видехом, свету жилище Отроковице. Тем Тя поем, и превозносим во веки.

**Слава.** Мертвии Тебе ради оживляются, жизнь бо составную родила еси, немии прежде, ныне благоглаголиви бывают, прокаженнии очищаются, недужи отгоняются, и духов воздушных множества побеждаются, Дево человеком спасение.

**И ныне.** Яже миру рождши спасение, Его же ради от земли на высоту взяти быхом, радуися всеблагословенная, покрове и державо, стено и утверждение, поющим Чистая: Господа воспевайте дела, и превозносите Его во веки.

*Катавасия.*

### Песнь 9. Ирмос.

**В**сяк земен да възграется, Духом просвещаем, да ликовствует же безплотных умов естество, почитая святое торжество Божия Матере, и да поют: радуися преблаженная, Богородице чистая присно Дево.

**Запев с поклоном.** Да Тебе вернии радуися зовем, иже Тобою радости причастницы бывше присносущней. Спаси нас от напастей, и варварскаго пленения, и от всякия инья раны, за множество Отроковице прегрешении, находящия человеком согрешающим.

**Запев.** Явилася еси просвещение наше и утверждение. Темже вопием Ти, радуися звездо незаходима, вводящая в мир великое Солнце. Радуися Едем отверзшая заключеннии, Чистая. Радуися сосуде, миро неистошимое на Тя излиянное приемшии.

**Запев.** Станем благоговейно в дому Бога нашего, и возопием, радуися миру Владычице. Радуися Марие Госпоже всех нас. Радуися едина Непорочная в женах и добрая. Радуися столпе огненнии, вводящи в вышнюю жизнь человечество.

**Слава.** Голубице яже Милостиваго родившая, радуися присно Дево. Радуися преподобных всех похвало. Радуися страдалцем венчание, радуися всех праведных божественное удобрение, и нам верным спасение.

**И ныне.** Пощади Боже наследия Твоего, грехи наша вся презрев ныне, на се имея молящую Тебе, яже на земли без семене рождшую Тя, великия ради

милости, восхотевша вообразиться Христе в человечество.

*Таже: Достояно есть... Трисвятое, и по Отче наш. Тропарь Богородице (1 раз). Слава, и ныне. Кондак 1 Господи помилуй (40 раз). Затем молитва Пресвятей Богородице похвалы:*

**О**, Пресвятая Госпоже Владычице Богородице, выши еси всех ангел и архангел, и всея твари честнейши, помощнице еси обидимым, ненадеющимся надеяние, убогим заступнице, печальным утешение, алчущым кормителнице, нагим одеяние, больным исцеление, грешным спасение, христианом всем поможение, и заступление: о, Всемиловитая Госпоже Дево Богородице Владычице, милостию Своею спаси и помилуй державу нашу, Церковь святую и вся православныя христианы, ризою Своею честною защити, и умоли Госпоже из Тебе без семени воплотившагося Христа Бога нашего, да препояшет нас силою Своею свыше, на невидимыя и видимыя враги наша. О, всемиловитая Госпоже Владычице Богородице, воздвигни нас из глубины греховныя, и избави нас от глада и губительства, от труса и потопа, от огня и меча, от нахождения иноплемennых и междуусобныя брани, и от напрасныя смерти, и от нападения вражия, и от тлетворных ветр, и от смертоносныя язвы, и от всякаго зла. Подаждь Госпоже мир и здравие рабом Своим, всем православным христианом, и просвети им ум, и очи сердечнии еже ко спасению. И сподоби ны грешныя рабы Твоя, Царствию Сына Твоего Христа Бога нашего, яко держава Его благословена и препрославлена, со безначальным Его Отцем, и с Пресвятым и благим и животворящим Его Духом, ныне и присно и во веки веком, аминь.

*Слава, и ныне. Честнейшую Херувим... (поклон в пояс). Слава, и ныне. Господи помилуй, Господи помилуй, Господи благослови (с поклонами).*

**Отпуст:** Господи Иисусе Христе Сыне Божии, молитв ради пречистыя Твоея Матере, честныя и славныя Ея похвалы и всех ради святых, помилуй и спаси нас, яко благ и человеколюбец.

**А**минь.

**Г**осподи помилуй (*трижды*).

*Исходные поклоны.*